

# PAULO ENA REVAREVA IHARUANA KORINTO TAUDIA EDIA

---

**1** <sup>1</sup>Lau Paulo, Keriso Iesu ena aposetolo taugu Dirava ena ura dainai, varavarada Timoteo ida, Dirava ena ekalesia taumui Korinto ai, bona helaġa taumui iboumui ai Akaia tanona idoinai, a tore henimuimu: <sup>2</sup>Tamada Dirava ena amo, bona Lohiabada Iesu Keriso ena amo, hariharabada bona maino bavabi.

## Hereva matadia

<sup>3</sup>Dirava aita imodaia; ia na iseda Lohiabada Iesu Keriso Tamana, Tama hebogahisina, tauhalo Diravana. <sup>4</sup>Emai hisihisi iboudiae lalodiae ia ese taumai e halodiamu, taunabunai ai ese hisi e animu taudia na taudia ihalodia dibamai; Dirava ena tauhalo e henimaimu ai ese ma a henidiamu. <sup>5</sup>Badina be Keriso e ani hisidiae emai ai e badamu heġereġerena tauhalo danu emai ai e badamu, Keriso dainai. <sup>6</sup>Taunabunai, hisi baiama ani, una na taumui ihalodia bona ihamaurimui totodia; a tauhalo baiama abia, una danu taumui ihalodia totona, ai a animu hisidiae umui danu o animu mai haheukamui ida tauhalona. <sup>7</sup>Ai a abidadama henimuimu danu; dibamai ai ida hisihisi ahuna o abiamu, ma ai ida tauhalo ahuna bavabia.

<sup>8</sup>Varavaramai e, a uramu Asia ai a aniva hisidiae ba diba: e gugubamai maseva, emai goada e oreva, banava baia mase ato. <sup>9</sup>A sibomai lalomai ai ato baia mase, taunabunai sibomai asia heabidadama, a mase taudiae hatorediae isimu Diravana a abidadama heniaiva. <sup>10</sup>Ia ese mase badana amo e hamaurimaiva bona e hamaurimaimu; a abidadama heniamu danu ia ese do baine hamaurimai. <sup>11</sup>Umui danu ba kahamai emui ġuriġuri ai; bena ġuriġuri momo amo baia davaria hariharina dainai hutuma ese Dirava bae hanamo.

### Emai heāgi badina

<sup>12</sup>Emai heāgi badina binai, lalomai ese e hamomokaniamu: emai kara tanobada ai bona umui emui ai a karamu na mai helağadia bona mai momokanidia ida; dia tanobada aonegana amo a Dirava ena harihari-bada amo. <sup>13-14</sup>Badina be ai ese hereva hehunidia asia tore henimuimu, a ba duahidia diba bona anidia ba lalo-davari herevadia mo. Egu helaro be harihari do asio dibadia ġoevaġoева ġaudia na anidia ba diba vaitani. Bena umui ese ba heāgilaimai, ai ese baia heāgilaimui hegereggerena ai, eda Lohiabada Iesu ena dina ai.

### Egu vasi herevadia

<sup>15</sup>Una na dibagu dainai, egu lalo-hadai gunana be dekemui ai baina vasi nato, harihari-bada iharuana ma baina henimui totona; <sup>16</sup>bena umui emui amo Makedonia bainala, ma Makedonia amo baina lou dekemui ai; bena umui ese Iudea bainala dalana ba lailaia nato. <sup>17</sup>Lalogu unu na hadaia toma daradara tauna na heto a? Eiava egu lalo-hadai be tanobada tauna ena lalo-hadai na heto, nega ta be “oibe” ma una nega tamona ai be “Lasi” danu a? <sup>18</sup>Dirava be momokani bena emai hereva na dia “oibe” bona “lasi”. <sup>19</sup>Badina be lau bona Siluano bona Timoteo ese Iesu Keriso, Dirava Natuna, a harorolai henimuiva na dia “oibe” bona “lasi”, to “oibe” mo. <sup>20</sup>Badina be ia lalonai Dirava ena gwauhamata iboudiai na “oibe”; una dainai ia lalonai Dirava i’imodaina na “amen” amo ta hamomokaniamu. <sup>21</sup>Ai bona umui na Keriso enai e haginida tutukatutukamu bona vada e horoda tauna na Dirava. <sup>22</sup>Ia toana danu ita latadai vada e atoa, bona ena Lauma toana ita lalodai vada e henida, toana bunai.

<sup>23</sup>Dirava hari lalogu dibana, lau na Korinto asina vasi badina korikori be na bogamui hisi dainai. <sup>24</sup>Ai ese emui abidadama asia biaguamu, to ai na emui moale ikahana taumai; badina be abidadama dainai o ginimu.

**2** <sup>1</sup>Lalogu na hadaia nato basina vasi lou, lalo-hisihisi baine vara na garina. <sup>2</sup>Badina be lau ese bama hahisimui, daika ese bema hamoalegu? Umui, na hahisimui taumui mo. <sup>3</sup>Bena egu revareva ta na torea, baina vasi negana ai ihamoalegu taudia ese bae hahisigu na garina. Na abidadama henimuimu, lauegu moale ai umui danu ba moale.

### Egu revareva gunana badina

<sup>4</sup>Badina be na tore henimui negana ai na lalogu e hisihisiva bona e metauvu; mai taigu ida na tore henimui, dia ihahisimui totona, to egu uraheni badana emui ai ba diba totona. <sup>5</sup>A hisihisi e havaraia tauna ese dia lau mo se hahisigu, a umui danu taina (herevana basina ha-ukaia) e hahisimui. <sup>6</sup>Una tau ena dika davana umui hutuma ese vada o

gwauraia vada e heğereğere; <sup>7</sup>harihari ena dika ba gwau tao bona tauna ba haloa, dara-doko ese baine gugubaia mase na garina. <sup>8</sup>Taunabunai na noimuimu, emui iura-henina lalonai bavabia lou. <sup>9</sup>Una dainai na tore henimui: toamui baina diba, hereva iboudiai o badina eiava lasi. <sup>10</sup>Umui ese tau ta ena dika ba gwau tao, lau danu ena dika baina gwau tao. Badina be tau ta ena dika bama gwau tao una na umui daimui ai bona Keriso vairanai bama gwau tao, <sup>11</sup>Satana ese bema hadarereda garina; badina be iena dibaka karadia na dibada.

### Egu laolao sivaraina

<sup>12</sup>Lau be Troa nala, Keriso ena sivalai namo iharorolaina, bena Lohiabada ese iduara ta e kehoa egū; <sup>13</sup>to asina noho namonamova, badina be tadigu Tito asina davaria. Taunabunai na hatonidia, Makedonia nala. <sup>14</sup>A Dirava aita hanamoia, ia ese Keriso ena kwalimu ai nega idoinai e hakaumaimu, bona ia sivaraina bonana namona na gabu iboudiai ai emai amo e hahedinaraiamu. <sup>15</sup>Badina be, ai na Keriso bonana namona Dirava vairanai, e hamauridiamu taudia ediai bona bae mase taudia ediai; <sup>16</sup>ini idia ediai mase bonana, mase ihavarana, a unu idia ediai mauri bonana, mauri ihavarana.

Ini ġaukara ai daika baine heğereğere? <sup>17</sup>Ĝau tamona, ai na dia haida na hehetu, Dirava ena hereva asia hoihoilaiamu, to mai momokanimai ida Dirava ese Keriso lalonai e henimaimu heğereğerena Dirava vairanai a herevamu.

### Apostolo dagina

**3** <sup>1</sup>Sibomai a hahenamo loumu o tomu a? Eiava, ai na haida heğereğeredia, hahenamo revarevadia emui ai eiava emui amo baia abi a? <sup>2</sup>Emai revareva na umui, lalomai ai e torea, taunimanima iboudiai dibadia bona e duahiamu. <sup>3</sup>Eme hedinarai vaitani umui na Keriso ena revareva, ai ese a reğuamu; dia ink amo se torea, a Mauri Diravana ena Lauma amo e torea; dia nadi ai se torea, a taunimanima lalodia ai e torea.

<sup>4</sup>Ai ese Dirava unu a abidadama henia tomamu, Keriso bagunai. <sup>5</sup>Ai na asi aonegamai ġau ta sibomai baia laloa ġoeva: aonegamai na Dirava ena amo. <sup>6</sup>Ia ese e ha-aonegamai, herohemaino matamatana isiaina ilaojenina taumai ai e halaomai; dia buka ai ta duahiamu ġauna a Lauma ese e hadibildamu ġauna. Badina be buka ġauna be hahemase ġauna, a Lauma ġauna be hahemauri ġauna.

<sup>7</sup>Hahemase isiaina ilao-henina herevadia nadi ai e tore na mai hururuhururuna ida ema; bena Israel taudia Mose vairana asie raraia diba, hururuhururuna dainai. <sup>8</sup>Ĝau tamona, una hururu-hururu se mia daudau. <sup>9</sup>Benaini, Lauma isiaina ilao-henina hururu-hururuna ese ia

basine hereia a? <sup>9</sup>Badina be taunimanima iğuidia bema mai hururu-hururuna, taunimanima iruhanegedia hururu-hururuna vada herea. <sup>10</sup>Momokani, gunaguna e hururu-hururuna ġauna harihari se hururu-hururumu, badina be ina hururu-hururu matamatana vada herea. <sup>11</sup>Bena se vanaha ġauna bema mai hururu-hururuna, e miamu ġauna hururu-hururuna vada herea.

<sup>12</sup>Taunabunai, unu a helaro tomamu dainai a hereva goadamu; <sup>13</sup>dia Mose na heto, vairana muko ai e koua, Israel taudia ese se miamu ġauna basie raraia tao helaoreana. <sup>14</sup>A lalodia e duhuva; una dainai taravatu gunana e duahiamu negadia ai una muko na dounu mia ema bona harihari; Keriso mo lalonai i vada eme heabi oho. <sup>15</sup>Oibe, Mose ena buka e duahiamu negadia ai muko ese lalodia e koumu ema bona harihari; <sup>16</sup>a lohiabada bae haġerea negana ai hari muko baine heabi oho. <sup>17</sup>Lohiabada na Lauma; bona Lohiabada Laumana e nohomu gabudia ai ura kwalimu danu e nohomu. <sup>18</sup>Ita iboudai vairada asi mukodia na heto Lohiabada hururu-hururuna ta hahedinaraimu; hevarvari na heto; bena e haidaudamu, ia heida-ida ai, hairai ta amo ela bona ma hairai la, Lohiabada Laumana dainai.

### Sivarai namo na dia hehuni ġauna

**4** <sup>1</sup>Iena hebogahisi dainai ina hesiai ġaukarana vada a abia; taunabunai ai na asia hesikumu. <sup>2</sup>Ai na hemarai karadia hehunidia vada a nege; dibaka karadia asia loalaimu; Dirava ena hereva asia hagagevaimu. A hereva momokanidia a gwaurai hedinaraimu Dirava vairanai; unu amo taunimanima lalodia a hanamodiamu emai ai.

<sup>3</sup>Emai sivarai namo bema hehuni, ia na mase e lao heniamu taudia mo ediae bema hehuni. <sup>4</sup>Ina tanobada diravana ese asi edia abidadama taudia lalodia vada e hadiburadia, Keriso namona, Dirava ihagoina tauna, ena sivarai namo diarina ediae baine tata dae roha na garina. <sup>5</sup>Badina be emai haroro badina na dia ai sibomai, to Keriso Iesu, ia na Lohiabada, bona ai, umui isiaimui ilao-henina taumai Iesu dainai. <sup>6</sup>Badina be Dirava eto “Dibura amo diari baine tara”; Diravana bunai ai lalomai ai e taramu, Dirava hairaina Iesu Keriso vairana ai baia itaia helaoreana.

<sup>7</sup>A ina kohu namona na e kara hodu lalodiai a abiāmu na heto; taunabunai siahū herea-daena na Dirava ena amo bainema, dia ai emai amo. <sup>8</sup>Ini amo unu amo hahedika e aru maimu, to asia dareremu; a daradaramu, to daramai asie dokomu; <sup>9</sup>e daġedaġe henimaimu, to bamomai asie rakatanimaimu; e haketomaimu, to asia masemu. <sup>10</sup>Nega idoinai tau-animai ai Iesu ena mase a loalaimu, Iesu ena mauri danu tau-animai ai baine hedinarai helaoreana. <sup>11</sup>Badina be dina idoidiai, ai mauri taumai taomai e tore Iesu dainai, Iesu ena mauri ai hidiomai ai baine hedinarai helaoreana.

<sup>12</sup> Benaini, ai lalomai ai mase e gaukaramu, a umui lalomui ai mauri e ġaukaramu. <sup>13</sup> Emai kamonai be e torea herevana heġereġerena, eto, Lau na kamonai, bena na hereva; ai danu a kamonaimu, bena a herevamu.

<sup>14</sup> Ai dibamai Lohiabada Iesu e hatorea isi Diravana ese ai danu Iesu ida baine hatoremai isi, bena ai bona umui ia vairanai baita gini. <sup>15</sup> Badina be ini ġau iboudiai na umui daimui ai; hutuma ese harihari-bada bae abia bena Dirava bae imodaia badabada helaoreana.

<sup>16</sup> Taunabunai, ai na asia hesikumu. Tau-animai e manokamu, a daba daba idoinai lalomai e hamatamatamu. <sup>17</sup> Badina be emai hisihisi taina, asi metauna bona asi vanahana ġauna, ese emai namo bada-hereana ta e havaraiamu, mai metauna bona mia-hanaihanai ġauna. <sup>18</sup> A itamu ġaudia na asia raraidi-mu, to mata-tuna ġaudia a raraidiamu; badina be a itamu ġaudia na mai negadia, to mata-tuna ġaudia na bae mia hanaihanai.

### Tanobada ġaudia bona guba ġaudia

**5** <sup>1</sup>Dibamai emai kalaga binai tanobada ai baine heroho, guba ai rumu ta Dirava ena amo baia abia, dia ima karakara ġauna to mia-hanaihanai ġauna. <sup>2</sup> Momokani, iniseni ai a ġanaġanamu, a ura badamu emai guba rumana baia hadokilaia; <sup>3</sup> bena baia hadokilaia negana ai basie davarimai kopi kavakava. <sup>4</sup> Ina kalaga ai a nohomu taumai emai maduna daidiae a ġanaġanamu; asia uramu baia dokia oho, to a uramu matamatana baia dokilaia; bena mauri ese mase baine hadonoa. <sup>5</sup> E karamai heġaeġae tauna na Dirava, bena ihamomokanina Laumana vada e henimai.

<sup>6</sup> Benaini, ai na lalomai e goadamu nega idoidiai. Dibamai tau-animai ai a nohomu negana ai, ai na dia Lohiabada enai; <sup>7</sup> badina be abidadama dainai a rakamu, dia ita-itana dainai. <sup>8</sup> Lalomai e goadamu, a uramu tauanina ena amo baia raka oho, Lohiabada enai baia noho. <sup>9</sup> Taunabunai, emai lalo-hadai tamona binai: iniseni ai eiava unuseni ai ia mo baia hamoalea. <sup>10</sup> Badina be ita iboudai Keriso ena hahemaoro gabuna ai baita gini, bena tau-anida ai ta karamu karadia davadia baita abi, namo eiava dika.

### Herohemaino

<sup>11</sup> Taunabunai, Lohiabada garina dibamai dainai, ai ese taunimanima lalodia a animu. Dirava vairanai lalomai e hedinaraimu; lau na uramu umui lalomui ai danu lalomai bae hedinarai. <sup>12</sup> Sibomai asia hahenamo loumu; to heaġi badina a henimuimu, ai daimai ai ba heaġi; bena taunimanima lalodia asie heagilaimu a oromadia mo e heaġilaimu taudia ba haere henidia diba. <sup>13</sup> Ai baiama kava, una na Dirava dainai; a baiama aonega, una na umui daimui ai.

<sup>14</sup> Badina be Keriso ena uraheni ese e haduamaimu: a tomamu, ta ese iboudiai daidiae a mase, taunabunai iboudiai vada e mase; <sup>15</sup> bona iboudiai daidiae e

mase, taunabunai e maurimu taudia na sibodia ediai basie mauri, to idia daidiae e mase ma e tore isi lou tauna enai bae mauri. <sup>16</sup>Taunabunai, ina murinai tau ta na oromana mo amo basia haeroa; ena be gunaguna Keriso na oromana amo a haeroa, to harihari unu asia haeroa toma. <sup>17</sup>Taunabunai, tau ta bema Keriso lalonai, ia na e kara tau matamatana na heto; ġau gunadia vada e lao bubuni, ġau iboudiai vada matamata. <sup>18</sup>Ĝau iboudiai danu Dirava ena amo; ia ese Keriso bagunai ia ida vada e haheroheda maino; bona herohemaino isiaina ilao-henina taumai ai vada e halaomai. <sup>19</sup>Herevana binai: Dirava be Keriso lalonai, tanobada taudia ia ida e haheroheda maino, eda kara dika asine lalo tao. Herohemaino herevana binai ai e henimai.

### Ai na Keriso ena gwaukau taumai

<sup>20</sup>Taunabunai, ai na Keriso ena gwaukau taumai: Dirava ese ai udumai amo e noimuimu, Keriso bagunai Dirava ida ba herohemaino. <sup>21</sup>Ia na kara dika asi dibana, to tau dikana ai e halaoa ita daidai, ita na ia bagunai Dirava ena maoromaoro ai baitala helaooreana.

**6** <sup>1</sup>Ai danu, ia ida a ġaukara heboumu taumai, a noimuimu, Dirava ena harihari-bada basio abia kava. <sup>2</sup>Badina be ia na e tomu, Nega namona ai na kamonai henimu, Hahemauri dinana ai na kahamu.

Benaini, nega namona binai, hahemauri dinana binai.

<sup>3</sup>Tau ta asia hahekawwanaia, emai hesiai ilao-henina baine dika na garina. <sup>4</sup>A emai kara iboudiai daidiae taunimanima bae diba, ai na Dirava ena hesiai taumai: haheauka dainai, hisihisi daidiae, ogoġami dainai, lalohisihisi daidiae, <sup>5</sup>shekwadi daidiae, dibura rumana nohona dainai, heloġoheloġo daidiae, hekwarahi dainai, hegima daidiae, hitolo dainai, <sup>6</sup>lalogoevaġoeva dainai, aonega dainai, lalo-manada dainai, hebogahisi dainai, Lauma Helaġa dainai, lalokau korikori dainai, <sup>7</sup>hereva momokani dainai, Dirava ena siahū dainai, kara maoromaoro ena tuari ġaudia imamai idibadia ai bona lauridia ai daidiae. <sup>8</sup>E heatolaimai bona e hahemaraimai. Namomai e gwaurai bona dikamai e gwaurai. Koikoimai e gwaurai, ġau tamona ai na momokani. <sup>9</sup>Asi harimai eto, ġau tamona mai harimai. Mase taumai eto, ġau tamona a maurimu. E dadabamai, to asie alamai mase. <sup>10</sup>Daramai e doko, to nega idiodiae a moalemu. Ogoġami taumai, to hutuma a hataġadiamu. Asi emai ġau ta, to ġau iboudiae na ai emai.

<sup>11</sup>Korinto taumui e, hereva momo a hamaorolaimui; lalomai anidia eme hedinarai emui ai. <sup>12</sup>Emai lalokau emui ai na dia maraġi; a emui hari eme maraġi. <sup>13</sup>Na hereva henimuimu, natugu na hehetu; na tomu davana ba henimai, emui lalokau na ba habadaia emai ai.

### Lalo rua

<sup>14</sup>Asie kamonaimu taudia ida basio hebamo. Badina be kara maoromaoro bona kara havara ede bae hetura toma? Eiava diari bona

dibura ede bae hebou toma? <sup>15</sup>Keriso bona Beliara ede bae herohemaino toma? Kamonai tauna ahuna be dahaka, asi ena kamonai tauna enai?

<sup>16</sup>Dirava ena dubu bona kaivakuku ede bae hatamonadia toma? Badina be ita na Mauri Diravana ena dubu; Dirava ena hereva heğereğerenä eto,

Lau na bogaragidai baina noho bona baina loa eva-eva;

Lau na edia Dirava ai bainala, bona idia be egu bese ai baina halaodia.

<sup>17</sup>Lohiabada ma eto,

Edia amo ba raka oho, dauhai ba noho;

Miro āguna enai basio dau kau, bena baina abimui dae;

<sup>18</sup>Lau na Tamamui ai bainala, bona umui be natugu mamaruanemui bona hahinemui ai baina halaomui.

Lohiabada siahu-hereadaenaunu e gwau toma.

**7** <sup>1</sup>Taunabunai, egu lalokau e, ini gwauhamata herevadia tame abi dainai, tau-anina bona lauma ihadikadia karadia iboudiai baita huri oho, helāga karadia baita hağuguru, Dirava imatauraina ai.

<sup>2</sup>Bavabimai dae: tau ta asia hadikaia, ta asia ha-ogogamia, ta ena kohu asia abia koikoi. <sup>3</sup>Bona asina gwau henimuimu: vada na hereva guna heğereğerenä, a lalokau henimuimu; umui ida baita mase hebou, baita mauri hebou. <sup>4</sup>Lau na abidadama henimuimu, na heağilaimuimu. Emai hisihisi iboudiai lalodlia taugu eme lo, bona na moale badamu.

### Tito ena heigo-itä

<sup>5</sup>Makedonia ai a kau negana ai, tau-animalasie lağaa ani, hekwarahi ese e geğemai dae; murimai ai be heatu, Ialomai ai be gari. <sup>6</sup>A dara-doko ihakeruna Diravana ese Tito ena gini-dae amo lalomai e hakerudia; <sup>7</sup>dia ena gini-dae mo dainai, a umui ese o abia dae sivaraina dainai danu. Badina be emui uraheni bona emui taitai bona emui helalo egu ai na e hamaoromai, bena na moale bada. <sup>8</sup>Egu revareva dainai lalomui e hisihisiva, bena na daradarava. To harihari asina daradaramu, badina be dibagu una revareva ese nega sina mo lalomui e hahisiva. <sup>9</sup>Harihari na moalemu, dia lalomui e hisihisiva dainai, to emui lalo-hisihisi ese helalokerehai e havaraia dainai. Badina be emui lalo-hisihisi na Dirava ena amo, taunabunai dika ta emai amo asio davaria. <sup>10</sup>Badina be Dirava ena amo lalo-hisihisina ese helalokerehai e havaraiamu, bona helalo-kerehai ese hahemauri e havaraiamu; basita daradaralaia. A tanobada ena amo lalo-hisihisina ese mase e havaraiamu. <sup>11</sup>Mani ba laloa: ina Dirava ena amo lalo-hisihisina dainai nahuamui o toho ani? lalomui o hamaoromaoro ani? lalomui e hekwarahi ani? o gari ani? o helaro ani? o haheauka ani? dika davana o henani? Kara iboudiai lalodliai kerere vada o hamaoromaoro.

<sup>12</sup>Una dainai na tore hemimui, dia kerere e havaraia tauna dainai, eiava e hadikaia tauna dainai, to emui lalokau korikori emai ai Dirava

vairanai baine hedinarai totona. <sup>13</sup> Unu amo taumai e lo; bona a moale danu, Tito ena moale dainai, badina be umui ese ia tauna o haloa. <sup>14</sup> Ia vairana na heāgilaimuiva, bena asio hahemaraigu: a herevalai henimui herevadia vada momokani, bona Tito vairanai a heāgilaimui herevadia danu vada momokani. <sup>15</sup> Tito ese umui e ura henimui lalo-dikamu, badina be iboumu ai emui kamonai karadia ia ese e lalo unemu; mai garimui bona mai hematauraimui ida o abia dae danu e laloa unemu. <sup>16</sup> Lau na moalemu badina be na abidadama henimui momokanimu.

### Herahia

**8** <sup>1</sup>Varavaragu e, Dirava ena harihari-bada, ekalesia oreadia Makedonia ai e harihari henidia, aia hadibalaimui. <sup>2</sup> Ena be edia hisihisi na bada, to edia moale na bada herea; ena be edia ogoāgami na bada, to edia heduru na bada herea. <sup>3</sup> Na gwauraia hedinaraimu, idia na edia goada heāgeregerena e hen, ma edia goada e hereaia danu; <sup>4</sup> bona e noimai lalo-dika, edia harihari īaudia baia abi, helāga taudia idurulaidia, eto. <sup>5</sup> Dia ai emai helaro mo asie haheāgeregerea. A, guna idia sibodia lalodia Lohiabada e henia, bona ai e henimai, Dirava ena ura heāgeregerena.

<sup>6</sup> Una dainai Tito a noia, ina herahia īaukarana ia ese e matamaia, bena ia ese emui ai do baine haāguārura ato. <sup>7</sup> Benaini, īau iboudiai emui ai na babada: abidadama, bona hereva, bona lalo-parara, bona haheauka, bona iura-henimai; ina herahia karana danu emui ai baine bada. <sup>8</sup> Asina haāganimuimu; to idia haida edia haheauka amo umui emui uraheni na dibaiamu, ia na momokani eiava lasi. <sup>9</sup> Badina be iseda Lohiabada Iesu Keriso ena harihari-bada vada dibamui: ia na taāga tauna, to umui daimui ai ogoāgami tauna ai ela, ena ogoāgami amo umui baine hataāgamui totona. <sup>10</sup> Egu lalo-hadai binai: ba karaia baine namo. Badina be laāgani muridai vada o haeroa bona o matamaia; <sup>11</sup> bena harihari ba haāguārura. Ihaerona ai o haraāga heāgeregerena, ihaāguārura ai danu ba haraāga. <sup>12</sup> Badina be tau ta lalona baine haraāga, iabi-daena be enai e miamu īauna heāgeregerena, dia e dabumu īauna heāgeregerena.

<sup>13</sup> Lau asina tomamu haida ese laāgadie bae ani, a umui be ba hekwarahi mase. <sup>14</sup> Lasi, iboumu ai ba heāgeregere. Harihari umui na mai emui īau, a idia be e ogoāgamimu; taunabunai, ba kahadia. Kerukeru vanegai umui ba ogoāgami, bena idia ese bae kahamui; bena vada ba heāgeregere. <sup>15</sup> Buka ai e torea heāgeregerena, eto,

Mana momo e gogo tauna ana buhu se mia,

A e gogo gadoi tauna ana be vada e davana.

<sup>16</sup> Dirava baita hanamo badina be ia ese Tito lalona ai umui iura-henimui vada e havaraia; <sup>17</sup> bena emai hahealo e abia dae, bona sibona ena ura dainai danu vada e vasi. <sup>18</sup> Varavarada ta danu ia ida vada a siaia

vasi; ia na mai harina namo, sivarai namo ihapiuna ai, ekalesia oreadia iboudiai lalodai. <sup>19</sup>Dia una mo, a ekalesia oreadia ese vada e abia hidi, ina herahia ġaukarana iloalaina ai baine bamomai, Lohiabada iheatolaina bona ai lalomai ihaharagadia totona. <sup>20</sup>Badina be emai gari tamona be tau ta ese baine habadelaimai, ina herahia badana a ġaukaralaiamu dainai; <sup>21</sup>bona emai ura tamona be baia ġaukara maoromaoro, Dirava vairanai bona taunimanima vairadai. <sup>22</sup>Ma varavarada ta idia ida vada a siaia vasi; ena goada be nega momo vada a dibaia loulou, a harihari e goada hereamu, umui e abidadama henimuimu dainai.

<sup>23</sup>Haida ese Tito henanadaina bema henanadai, ia na lau bamogu, raruosi a ġaukara heboumu umui daimui ai. Eiava hari varavarada henanadaidia bema henanadai, idia na ekalesia oreadia edia hesiai ilao-henina taudia, Keriso iheatolaina. <sup>24</sup>Taunabunai, emui lalokau toana bona ai ese a heaġilaimuimu badina ba hahedinarai, ekalesia oreadia vairadai.

### Helaġa taudia idurulaidia herevadia baina tore henimui na asi badina.

**9** <sup>1</sup>Badina be emui lalo-haraġa na dibagu bona Makedonia taudia vairadai na heaġilaimui. <sup>2</sup>nato “Akaia na laġani gunana ai e heġaġae”. Bena emui goada ese idia e hagoadadia. <sup>3</sup>A varavarada vada na siaidia vasi, a heaġilaimui kava na garina, bena umui ba heġaġae, na herevalaimui heġereġerena ai. <sup>4</sup>Bena Makedonia taudia haida ese bema bamogu, baiama vasi davarimui, a do asio hegaegae, bena emai heaġi kava dainai baiama hemarai, umui danu boma hemarai. <sup>5</sup>Taunabunai na laloa varavarada aina noidia hari namo, idia bae vasi guna, o gwauraia hamata ġauna bae haboua heġaġae; bena ia na herahia ġauna korikori ai bainela, dia ai ese emui ai baiama dadihaia ġauna na heto.

<sup>6</sup>Ba laloa: baine hado gadoi tauna ese baine ġei gadoi; baine hado hoho tauna ese baine ġei hoho. <sup>7</sup>Ta ta ena lalo-hadai ena lalo-hadai ai bae hen; basie hen maumau, bona dia hahedua dainai basie hen. Badina be mai moalena ida e henimu tauna Dirava ese e lalokau heniamu.

<sup>8</sup>Dirava na mai siahuna herahia ġaudia iboudiai emui ai baine habada; taunabunai, nega idoidiai ġau bavabi hoho, bona emui kara namodia iboudiai ba habada. <sup>9</sup>Buka ai e torea heġereġerena, eto,

E ġiġi rohoroho, ogogami taudia e henidia;  
Ena kara maoromaoro bae mia hanaihanai.

<sup>10</sup>Uhe bona aniani e henimu Dirava ese uhe baine henimui bona baine hatubu; emui kara maoromaoro huahuadie danu baine hahoho. <sup>11</sup>Ia ese baine harihari henimui, bena umui danu ba harihari; bena ai daimai ai Dirava ihanamolaina baine bada.

<sup>12</sup>Badina be ina herahia ena heduru ese helaġa taudia edia dabu ġaudia e henidia ġugurumu; bona Dirava ihanamona danu e habadaiamu.

<sup>13</sup> Umui ese Dirava ba hanamoa, badina be ina heduru karana ese e hamomokanimuimu, umui na Iesu Keriso ena sivarai namo iabi-daena taumui korikori; e hanamoamu danu, emui harihari-bada idia ediai bona taunimanima iboudiai ediai daidiae. <sup>14</sup> Idia ese e lalokau henimuimu, bona Dirava e noiamu daimui ai, badina be Dirava ena harihari-bada na umui emui ai. <sup>15</sup> Dirava aita imodaia, ena harihari-bada herea-daena, igwauraina asi dibadia īgauna, dainai.

### Emui maumau davadia

**10** <sup>1</sup>Lau Paulo, Keriso ena manau bona ena manada daidiae, na noimuimu. Lau binai, dekemui ai na nohova mai manaugu ida, a dauhai na nohomu ai na gwau henimuimu. <sup>2</sup>Lau na noimuimu, dekemui ai baina noho negadia ai gwaugwau badina ta basine hedinarai. īau tamona, lau na tomamu haida, e gwauraimaimu tau-anina ena dala ai a rakamu e tomu taudia, baina gwau henidia dikadika. <sup>3</sup>Ena be tau-anina ena dala ai a rakamu, to emai tuari na dia tau-anina tuarina. <sup>4</sup>Badina be emai tuari īaudia na dia tau-anina ena, a Dirava ena amo e maimu siahuna, kohoro irohodia. <sup>5</sup>Hepapahuahu bona Dirava idibana e laoa ahumu īaudia iboudiae a haketodiamu; bona lalo-hadai iboudiae a īguidiamu, Keriso ikamonaihenina ai; <sup>6</sup>bona umui ba kamonai īgūguru negana ai, gwau-edede iboudiae davadia baia hen.

<sup>7</sup>Hedinarai īaudia ba itadia. Tau ta baineto ia na Keriso ena, ia na baine haeroa lou, ai danu Keriso ena, ia heğereğerena. <sup>8</sup>Lau na emai siahu, Lohiabada ese e henimai dia ikure-dobimui totona a ilarebamui helaoreana, bainama heāgilaila, lau na basinama hemarai. <sup>9</sup>Basioto egū revareva na ihagarimui totona na tore henimuimu. <sup>10</sup>Badina be haida e tomu “Ena revareva na mai metaudia bona mai siahudia, to tau-anina na manoka-manoka bona uduna herevadia danu asi mamidia”. <sup>11</sup>Unu e laloa tomamu tauna baine haeroa, dauha amo emai hereva e vasimu heğereğerena dekemui ai emai kara unu baia kara toma.

<sup>12</sup>Ai na asia tomamu ai na sibodia e hahenamomu taudia heğereğeredia. Idia na sibodia e hahetohomu, bona sibodia e haheğereğeremu: madi, asi edia aonega. <sup>13</sup>Ai na basia heāgi kava, a Dirava ese e henimai hahetohona ai baia heāgi: hahetohona benai emui ai vada e kau. <sup>14</sup>Emai siahu asia halataiamu, hetoana asia hanaiamu, umui iabi-vareaimui; badina be Keriso ena sivarai namo a vasilaia. <sup>15</sup>Haida edia īaukara, ai emai hetoa murimurinai, asia heāgilaiamu; to ai na a helaromu emui kamonai do baine tubu badabada, bina umui emui amo emai hetoa do baine daudau. <sup>16</sup>Bena unukahamui tanodia ai sivarai namo do baia harorolaia; a idauna ta ena īaukara basia heāgilaila.

<sup>17</sup>A ta baine heāgi, ia ese Lohiabada baine heāgilaila. <sup>18</sup>Badina be sibona e hahenamomu tauna na namona basine gvauraia, a Lohiabada ese e hanamoamu tauna hari.

**11** <sup>1</sup>Lau na uramu egu kavakava sina ba haheaukalaia. Mani emui kara ba haheauka henigu. <sup>2</sup>Badina be Dirava ena vağeğe heğereğerenai daimui na vağeğemu; e kara Keriso enai maohenimui vada na kara, haneulato rami-hebouna na heto. <sup>3</sup>To lau na garimu, gaigai ese Heva e koia heğereğerenai ai, helalo idau-idau ese bae koimui, bena emui lalokau momokanina bona ġoeva-daena Keriso enai na ba rakanania. <sup>4</sup>Ta ese Iesu idauna bema harorolaia, dia ai ese a harorolaiava heğereğerenai eiava Lauma idauna boma abia dae, dia o abia dae guna laumana heğereğerenai eiava sivarai namo idauna boma kamonai, dia o kamonai guna ġauna heğereğerenai o abi dae harağamu ani? <sup>5</sup>Lau na tomamu, ene apusetolo hereadie na ġau ta ai asie hereagumu. <sup>6</sup>Ena be hereva igwauraidia ai lau na dia heğereğere, to lalogu ena diari na dia unuheto: ġau iboudiai emui ai vada a hahedinaraiva.

<sup>7</sup>Sibogu na hahemanau, umui bae imodaimui totona; Dirava sivaraina namona na harorolai henimuiva asi davagu. Na kerere a? <sup>8</sup>Ekalesia oreadia idaudia edia kohu na henao na heto, davagu ai na halao, umui isiaimui ilao-henina totona. <sup>9</sup>Dekemui ai na nohova negana ai nega haida na dabuva, to umui asina hahekwarahimuiva; badina varavarada, Makedonia amo ema taudia, ese egu gabu ġaudia e heniguva. Ĝau ta ai asina hahekwarahimuiva, bona basina hahekwarahimui.

<sup>10</sup>Keriso ena hereva momokani lalogu ai e miamu dainai, tau ta ese ina egu heaġi badina na egu amo basine abia oho, Akaia kahana idoinai. <sup>11</sup>Badina be dahaka? Asina Ialokau henimuimu a! Dirava dibana na lalokau henimuimu. <sup>12</sup>A na karamu karadia do baina kara; bena edia dala e tahuamu bae heaġi, baeto ġaukara ai idia na ai heğereğeremai, taudia na dala ta basie davaria. <sup>13</sup>Badina be idia na apusetolo koikoidia, ġaukara koikoi taudia, sibodia Keriso ena apusetolo ai e hahelao. <sup>14</sup>Unu na basita hoalaidia. Badina be Satana sibona diari aneruna ai e hahelao; <sup>15</sup>unuhetomana ena hesiai taudia ese kara maoromaoro taudia ai e hahelaomu; a dokodia ai be edia kara ihaheğeregeredia bae abi.

<sup>16</sup>Na gwau loumu, ta basinetu lau na kavakava. Aunu boma laloa toma, boma haheauka henigu, kavakava tauna boma haheauka henia na heto; bena taina bama heaġi. <sup>17</sup>Hari na hamaorolaimuimu herevadie na dia Lohiabada ena amo, to sibogu na hereva kavamu, na heaġi kavamu. <sup>18</sup>Hutuma ese tau-anina ġaudia e heaġilaimu; benaini, lau danu unu baina kara toma. <sup>19</sup>Badina be umui, aonega taumui, na kavakava taudia ihaheaukahenidia mai dibamui. <sup>20</sup>Hesiai ai e ġuimiuimu tauna o haheauka heniamu; amui e ani oremu tauna o haheauka heniamu; e hahekwarahimuimu tauna o haheauka heniamu; e dadaraimuimu tauna o haheauka heniamu; vairamui e huaridiamu tauna o haheauka heniamu. <sup>21</sup>Ai na a hemaraimu, badina ai na mamanoka-mamanoka. A ta baine heaġi, lau danu baina heaġi. Na hereva kavamu, ani? <sup>22</sup>Idia na

Heberu taudia a? Lau danu. Idia na Israel besena a? Lau danu. Idia na Abraham garana a? Lau danu. <sup>23</sup>Idia na Keriso ena hesiai taudia a? Lau ese na hereadiamu. Na hereva kavamu, ani? Na hekwarahi bada; dibura rumadia ai e kougu loulou; e dadabagu dikadikava; nega hoho masegu danu e kahira-kahirava. <sup>24</sup>Nega ima Iuda taudia ese hekwadi toi-ahui taurahani-ta amo e kwadigu. <sup>25</sup>Nega toi au amo e dadabagu. Nega ta nadi amo e hodogu. Nega toi na ġui kau lagatoidia e hure kau; hanuaboi ta dina ta gadobada ai na hure. <sup>26</sup>Egu laolao na momo: sinavai ai na hekwarahi; dadidadi taudia imadia ai na hekwarahi; egu bese taudia imadia ai na hekwarahi; idau bese taudia imadia ai na hekwarahi; hanua lalodiae na hekwarahi; tano ġaġaedia ai na hekwarahi; gadobada ai na hekwarahi, varavara koikoi imadia ai na hekwarahi. <sup>27</sup>Na hekwarahimu; taugu e boeramu; na noga rani louloumu; e hitologumu, na ranu masemu, asi agu; keru ese e hamasegumu; dabua ai na dabumu. <sup>28</sup>Dia ini tau-anina ġaudia mo; to lalogu danu dina iboudiae hekwarahimu, ekalesia oreadia ireġudia ai. <sup>29</sup>Daika e manokamu, bena lau asina manokamu? Daika e hekwakwanaimu, bena lau lalogu se siahumu? <sup>30</sup>Lau bama heaġi, bena egu manoka-manoka baina heaġilaia. <sup>31</sup>Dirava, eda Lohiabada Iesu Keriso Tamana, bae imodaia hanaihanai Diravana, ia hari dibana lau na asina koikoimu. <sup>32</sup>Damasko ai, Areta Ĝaubada ena gavana tauna ese Damasko hanuana e gimaia, lau idabai-taogu totuna. <sup>33</sup>To bosea lalonai e udagu, maġu gaba-mauruna amo e tugu dobi; bena na heau mauri, ia imana lalona amo.

**12** <sup>1</sup>Heaġi na dia namo, to ma baina heaġi: mata-hanai bona Lohiabada ihahedinaraina herevadia baina gwaurai. <sup>2</sup>Keriso lalonai tau Ia dibagu, laġani gwauta-hani muridai e heabi isi guba ihatoina ai; a tau-anina lalonai eiava tau-anina murimurinai e heabi isi na asi dibagu, Dirava hari dibana. <sup>3</sup>Una tau be dibagu, a tau-anina lalonai eiava tau-anina murimurinai e heabi isi na asi dibagu, Dirava dibana; to dibagu ia na Paradiso ai e heabi isi, <sup>4</sup>hehuni herevadia e kamonai, taunimanima basie gwaurai diba herevadia. <sup>5</sup>Una tau hari baina heaġilaia, a sibogu basina heaġi. Eiava, sibogu egu manoka-manoka mo baina heaġilaia. <sup>6</sup>Heaġi bama ura, to basinama heaġi kava; hereva momokani bama gwaurai hari. A asina heaġimu, tau ta ese baine lalogu, lau na herea, dia egu ai e itamu bona e kamonaimu heġereġerena, na garina.

<sup>7</sup>E hahedinarai henigu ġaudia babada heherea daidiae, ġiniġini ta, amo e gwadagu, baina hekokoroku garina; una na Satana ena hesiai tauna na heto, itutulaigu ġauna ai ela, baina hekokoroku herea na garina. <sup>8</sup>Una ġau dainai nega hatoi Lohiabada na noia, baine abia oho. <sup>9</sup>To ia ese e hamaorogu eto “Egu harihari-bada na oiemu ai baine davana, badina be manoka-manoka ai lauegu siahu na herea”. Taunabunai egu manoka

baina heāilaia mai moalegu ida, bena Keriso ena siahu egu ai baine kau.

<sup>10</sup> Una dainai, manoka-manoka bona badu herevadia bona ogogami bona dağedağe karadia bona hahehisī ġaudia be Keriso dainai na moalelaimu; badina be na manokamu negadia ai na goadamu.

<sup>11</sup> Vada na heāgi kava, to umui emui kerere; umui ese boma hanamogu bema namo. Badina be ene aposetolo hereadie ese lau asie hereagumu; ġau tamona, lau na dia ġau ta. <sup>12</sup> Momokani, aposetolo toadia na umui bogaragimui ai na karava mai haheukagu ida: toa bona hoa karadia bona siahu karadia. <sup>13</sup> Edena ġau ekalesia oreadia idaudia ese e abia a umuiasio abia a? Ina tamona mo: asina hahekwarahimui. Mani ina egu dika tamona ba laloa nege.

### Egu heigo-itahatoina

<sup>14</sup> Nega ihatoina binai vada name heġaeġae, baina vasi na tomu; bona basina hahekwarahimui. Lau na dia emui kohu asina tahuamu, a umui hari na tahuimu; badina be memero ese kohu basie habou tamadia sinadia edia, a tamadia sinadia ese kohu bae habou natudia edia. <sup>15</sup> Lau na mai moalegu ida egu kohu baina ha-ore bona tau-anigu danu baina ha-ore, umui laumamui daidiai. Lau ese na ura henimui badamu dainai umui ese o ura henigu maraġimu a! <sup>16</sup> Benaini, asina hahekwarahimui. A readia dibaka karana ta amo na koimui o tomu, bena na abimui. <sup>17</sup> Be; dekemui na siaidia vasi taudia edia amo na koimui a? <sup>18</sup> Tito na noia; bena varavarada ta ia ida na siaidia vasi. Be; Tito ese e koimui a? Ai raruosi na lauma tamona ena kara asia karamu a? Dala tamona ai asia rakamu a?

<sup>19</sup> Reana umui na nega daudau vada o laloa ai na emai kara a hekoramu. Ai na Dirava vairanai a herevamu, Keriso lalonai. Egu lalokau e, ġau iboudiai a karamu umui ihagoadamui. <sup>20</sup> Lau na na garimu, baina vasi negana ai baina davaramui, umui na dia lauegu ura heġereġerena; umui danu lau ba davariġu, dia umui emui ura heġereġerena; bena heai, vaġeġe, badu, ani-gunita, hahebade, maumau, hekokoroku, heloġo-heloġo, bae vara. <sup>21</sup> Na garimu danu, baina vasi negana ai egu Dirava ese baine hahemaraigu umui bogaragimui ai; bona kara dika taudia hutuma taidia baina tai, badina be edia mata-bodaga, edia heuda-hanai, edia lebulebu karadia amo, asie helalo kerehaimu daidiai.

**13** <sup>1</sup>Nega ihatoina binai baina vasi. Rarua eiava tatoi edia hereva daidiai hereva iboudiai bae hamomokani. <sup>2</sup>O kerere guna taumui bona harihari o kereremu taumui, nega gunana ai na sisiba henimui bona harihari dauha amo ma na tore henimui: nega iharuana na vasi heġereġerena, baina vasi negana ai basina bogamui hisi. <sup>3</sup>Toana bunai umui o tahuamu ġauna, Keriso lauegu amo e herevamu toana. Ia na emui ai se manokamu, a lalomui ai e siahumu. <sup>4</sup>Badina be ia na manoka-

manoka ai e hasatauroa, to Dirava ena siahu dainai vada e maurimu. Ai danu mamanoka ia lalonai, to eda hebamo lalonai ai na Dirava ena siahu amo ia ida baia mauri.

<sup>5</sup>Sibomui ba hetahu bona sibomui ba hediba, umui na abidadama taumui eiava lasi. Lalomui asie pararamu Iesu Keriso na lalomui ai a? Bema lasi, umui na dia hegeregere. <sup>6</sup>Lau na uramu umui ba diba, ai na hegeregere. <sup>7</sup>Dirava a noiamu, umui na basio kara dika; dia ai maoromai bae gwaurai, a, ena be ai kereremai bae gwaurai to umui ba kara maoromaoro, helaoreana. <sup>8</sup>Badina be hereva momokani igwau-tubuna na asi dibamai; ikahana mo dibamai. <sup>9</sup>Badina be ai a manokamu umui o goadamu negadia ai a moalemu; emai noinoi tamona binai, umui ba namo ġuguru.

<sup>10</sup>Taunabunai, lau na dauha amo na tore henimuimu; bena baina vasi negana ai Lohiabada ese vada e henigu siahuna, una na taunimanima ihaginidia dia ihaketodia ġauna, na basina ġaukaralaia daġedāġe.

#### Hahetoni herevadia

<sup>11</sup>Varavaragu e, na hahetonimuimu; ba namo ġuġuru, egū hereva ba kamonai; lalomui bae tamona; maino ai ba noho. Bena uraheni bona maino Diravana ese baine bamomui. <sup>12</sup>Haherahu helaġana amo ba hahenamo heheni. <sup>13</sup>Helaġa taudia iboudiai ese e hahenamo henimuimu.

<sup>14</sup>Lohiabada Iesu Keriso ena harihari-bada bona Dirava ena uraheni bona Lauma Helaġa ena hetura ese iboumui ai bae bamomui.